

San Pablobi EFESO Bainni utire toyani saobi

Saludo

¹ Yè'è, Pablo hue'eguëbi, Riusubi yè'ère cuencueni re'huaguëna, baguëre ta'yejeiye yo'o conguë ba'iguë'è. Jesucristobi yè'ère choini re'huaguëna, baguë yo'ore yo'oguë ba'iyë. Ja'nca ba'iguëbi, mësacua Cristo bain baguëni si'a recoyo ro'tajën ba'ijënna, mësacua Cristo bainreba Efeso huë'e jobore ba'icua, ja'ancuani utire toyani saoyë yè'è.

² Mai Taita Riusu, mai Èjaguë Jesucristobi mësacuani ai oijën conjën, mësacuani ai recoyo bojo güeseja'bë cayë yè'è.

Bendiciones espirituales en Cristo

³ Yureca, mai Taita Riusure ro'tato, mai Èjaguë Jesucristo Ja'quë ba'iguëna, baguë ta'yejeiyereba ba'iyete bojoreba bojojën cañuni. Baguëbi maire ëñani, Yè'è bain Cristoni si'a recoyo ro'tajën ba'icua re'yejeiyereba re'oye conza caguë, baguë guënamë re'oto bayete caraye beoye maina jo'cabi.

⁴ Èn yijare re'huani jo'casirën quë'rë ja'anrë mai ba'ija'yete ro'tani, baguë bainreba ba'ija'yete cuencueni, Jesucristo tëani baja'yete re'huani tonbi. “Yè'è bainreba ba'ija'cuabi gare recoyo tënoreba tënosi'cua ba'ijën, gu'a jucha gare senjosi'cua ba'ija'bë” caguë,

⁵ mai ba'ija'yete ro'tani, maini ai yëreba yëguë baj'i. Ja'nca yëguë sëani, Jesucristobi mai gu'a jucha ro'ire junni tonja'ñete ro'tani, mai ba'ija'ye, baguë bainreba ba'ija'yete cuencueni, Yë'ë re'o zin hua'nare bacuare re'huani baza caguë, baguë yo'oguë ba'ija'yete bojoguë ro'tani, cuencueni tonbi Riusu.

⁶ Ja'nca cuencueni tonguëna, maibi yureca baguë ta'yejeiyereba ba'iyete jo'caye beoye bojoreba bojojën cañuni. Baguë guënamë re'oto bayete maini ai ba'ie ai re'oye jo'caguë ba'iji. Baguë Zin ai yësi'quë naconi te'e zi'inni ba'icuabi baguë bayete ai coreba cojën, ai bojoyë mai cajën, baguë ta'yejeiye ba'iyete jo'caye beoye cajën bañuni.

⁷ Riusubi maini, gu'a jucha yo'ojën ba'isi'cuani ai oiguë basi'quë sëani, baguë Zin Jesucristobi crusu sa'cahuëna junni tonguëna, baguë zie jañuni tonse'ebi Riusu bainrebare re'huasi'cua ba'iyë mai. Mai gu'a jucha yo'ojën ba'ise'ere gare se'e ro'tama'iguë ba'iji Riusu.

⁸ Maini ja'nca ai yëreba ai yëguëbi baguë ba'iyete ta'yejeiyereba maini masi güeseji.

⁹ Baguë ai ba'irën cuencueni re'huase'ere, baguë yurerën tēca yahue masise'ere yurera maini te'e ruiñe masi güeseji. Baguë Zin Jesucristo raoja'yete zoe ro'tani, maini yureña masi güesebi.

¹⁰ “Baguë raoja'rën ti'anguëna, si'aye yë'ë re'huani jo'case'e, yija re'oto, guënamë re'oto re'huani jo'case'e beoru ñë'coni baguëna jo'caza” caguë yo'obi Riusu.

¹¹ Ja'nca yo'oguëbi maire'ga cuencueguëna, maibi baguë naconi te'e zi'inni baë'ë. Baguë ai

ba'irën ba'ise'e'ru yurera maire ja'nca zi'inni ba'iji. Ai ta'yejeiye yo'oye pore Ëjaguë sëani, maire choini baguëna, baguë bayete te'e conì bayë mai.

¹² Ja'nca sëani, mai hua'nabi Cristoni si'a recoyo ro'tajën, yequëcua'ru quë'rë ja'anrë ro'tajën ba'icuabi baguë ta'yejeiyereba ba'iyete bojojën cañuni. Baguë ba'iyete ai ba'iyë quëani achoñuni.

¹³ Mësacua'ga baguë te'e ruiñe ba'i cocarebare achani, Cristo tëani bayete masini, mësacuabi ai bojojën, Cristoni si'a recoyo ro'tajënna, Riusubi baguë coca cani jo'case'e'ru güina'ru yo'oguë, baguë Espíritute mësacuana raoni jo'cani, baguë bainrebare mësacuare re'huani babi.

¹⁴ Ja'nca re'huani baguëna, mësacuabi baguë Espíritute bajën, baguë guënamë re'oto bayete coja'rën ti'añe tëca bajën, mësacua conì baja'yete te'e ruiñe masiyë. Ja'nca masijën, baguëni bojojën, baguë ta'yejeiyereba pore Ëjaguë ba'iyete ai ba'iyë quëani achojën, si'a bainni masi güesejën bañuni.

Pablo pide a Dios que dé sabiduría a los creyentes

¹⁵ Riusubi maina ja'nca insini jo'caguëna, yë'ë'ga mësacua si'a recoyo ro'tase'ere achani, ai bojohuë. Mësacuabi mai Ëjaguë Jesusni si'a recoyo ro'tani, si'a baguë bainni ai recoyo oijën conjënna, yë'ë'ga ja'anre achani,

¹⁶ ai bojo recoyo re'huani, Riusuni jo'caye beoye mësacuare surupa caguë, mësacua ba'iyete Riusuni si'arën senni achaguë ba'iyë yë'ë.

¹⁷ Mai ta'yejeiyereba Ëjaguë Riusu, mai Ëjaguë Jesucristo Ja'quë, ja'anguëni senni achaguë, baguë ta'yejeiye masiyete mësacuani te'e ruiñe masi

güesejë'en señë. Baguë ba'iyete re'oye ye'yeni, baguëni quë'rë se'e ai re'oye masi güesejë'en, señë yë'ë.

18 Ja'nca masi güesequëna, mësacuabi Riusu ba'iyete gare huesësi'cua ba'ijën, mësacua yua baguë ta'yejeiye ba'iyete ai ëama'iñereba masija'cua'ë. Baguë guënamë re'oto bayete mësacua gare carajeiye beoye coni baja'yete masini, yë'ëre choisi'quë sëani, baguë naconi si'arën ba'ija'yete conni bazaniñë cajën, si'a baguë bain naconi ai ta'yejeiye bojojën ñë'caja'yete gare jo'caye beoye ëjojën ba'ija'cua'ë.

19 Baguë ta'yejeiyereba pore Ëjaguë ba'iyere'ga masija'cua'ë mësacua. Mai gare ëñama'ise'e ba'iyë'ru quë'rë ai ta'yejeiye yo'oye poreguëbi baguë bainre, Cristoni si'a recoyo ro'tacuare sëani, maire ai ta'yejeiye ai re'oye conni cuiraji. Ja'nca ai ta'yejeiye yo'oye poreguëna, maibi yuara masiyë,

20 Cristo junni tonsi'quëni huajë güesesi'quë sëani. Maina Raosi'quëreba ba'iguëbi junni tonguëna, mai pore Ëjaguë Riusubi baguëni huajëreba huajë güeseni, si'a guënamë re'oto ba'icua'ru quë'rë ta'yejeiye Ëjaguëre baguëte re'huani, baguë jëja ca'ncona bëa güesebi.

21 Ja'nca bëa güesequë, si'a guënamë re'oto ëjacua, si'a ën yija re'oto ëjacua, si'a ëjacua ba'ijën ba'isi'cua, si'acua'ru quë'rë ai ta'yejeiye Ëjaguëre ba Cristore re'huani baguëni guanse güesebi Riusu.

22 Ja'nca guanse güesequëbi ba je'ocua si'acuare ta'yejeiye ënseni, bacua, baguë bayere'ga si'ayete yë'ë bayete jo'cani, Yë'ë bayete si'aye bajë'en

më'ë'ga, caji. Yë'ë bainreba jubë si'a jubëte ñë'coni, bacua quë'rë ta'yejeiyereba Ējaguë ba'ijë'ën, caji.

²³ Ja'nca cani jo'caguëna, mai yua Cristo bain jubëreba ba'ijën, Cristoni te'e zi'inni ba'icua ba'ijën, baguëre yo'o concua re'huasi'cua ba'iyë mai. Ja'nca re'huasi'cua ba'ijënna, baguë bayete cato, gare carajeiye beoye maina si'arënreba ro insireba insini jo'caguë, maina ai re'oyereba ai re'oye cuiraji Cristo.

2

Salvos por el amor de Dios

¹ Yureca, mësacua ja'anrë ba'ijën ba'ise'ere ro'tato, mësacua gu'a jucha yo'ojën ba'ise'e ro'ire gare bënni senjoja'cua se'ga ba'ijën ba'nhuë. Riusuni gare huesëcua ba'ijën,

² ro ën yija bain yo'ojën ba'iyë'ru gu'aye yo'ojën, zupai huati ëñoñe se'gare'ru yo'ojën ba'ijën ba'nhuë mësacua. Ai gu'a huati sëani, si'a bainni coqueza caguë, Riusu yëye'ru maini tin yo'o güeseji. Riusu guanseni jo'case'e'ru si'a bainni gare tin yo'o güeseji baguë.

³ Ja'nca yo'o güesequëna, mai si'acua'ga zupai huati yëye'ru yequërëña yo'ojën ba'ijën ba'nhuë. Ro mai gu'a ëase'e se'gare ro'tajën, gu'aye yo'oye se'gare ro'tajën, yo'o bi'rajën ba'nhuë mai. Si'a ën yija bain yo'oye'ru güina'ru yo'ojën, Riusu yëye'ru gare yo'oye güejën, Riusu bënni senjoja'cua se'ga ba'ijën ba'nhuë mai.

⁴ Ja'nca ba'isi'cuareta'an, Mai Ējaguë Riusu, yua si'a bainni oire bani caraye beoye coñe yëguëbi

maire ai ta'yejeiye ai yëguë, maini bënni senjoñe ro'tama'iguë baji'i.

⁵ Maire bënni senjoja'ñe ba'ise'ere ro'tato, ro gu'aye yo'ojën ba'isi'cua, mai se'gabi mame recoyo re'huaye gare porema'icua ba'ijën ba'nhuë. Ja'nca ba'isi'cua ba'ijënna, Riusubi maire ai ba'iye ai yëguëbi mame recoyo ba'icuaire maire re'huani, baguë re'o bainre re'huani, Cristo naconi maire babi. Ja'nca sëani, Riusu se'gabi re'oye yo'oye yëguë, mësacuaire tëani, mësacuani baji.

⁶ Ja'nca tëani baguëbi, baguë ba'i re'otore maire masi güeseni, Cristo Jesús huajë güesesi'quë naconi maini te'e bëa güeseji. Baguë naconi carajeiye beoye si'arën ba'i güeseji maire.

⁷ Ja'nca güesequëbi bacuani ai ba'iye ai oire baguë, baguë ba'i re'oto ba'ija'rën ba'ijënna, si'a baru ba'icuaire maire ëñoñe ro'taji. “Ëñajë'ën. Ro gu'a jucha yo'ojën ba'isi'cuabi yë'ë yëye'ru yo'oye gare poremajënna, bacuani ai ba'iye ai oire baguë, mame recoyo bacuaire re'huani, yë'ë ba'i re'otona tëani bahuë. Cristo Jesús naconi yë'ë bayete te'e conì bacua ba'iyë bacua” maire caja'guë'bi Riusu.

⁸ Ja'nca sëani, Riusu tëani base'ere cato, baguë se'gabi mësacuani oire bani, mësacuaire tëani babi. Ro mësacua yo'ojën ba'ise'ebi baguë ba'iruna ti'añe gare porema'icua baë'ë. Mësacuabi Cristoni si'a recoyo ro'tajënna, baguë se'gabi mësacuaire tëani babi baguë.

⁹ Mësacua se'gabi baruna ti'añe ro'tajën, Re'oye yo'oni ti'anza cajën ba'icuata'an, ti'añe gare porema'iñë. Yë'ë se'gabi re'oguë sëani, Riusu bainguë ruën'ë yë'ë catoca, Riusubi yëma'iji. Ja'nca

sëani, Riusu se'gabi maini oire bani, maire tëani baji.

¹⁰ Riusubi maire re'huani jo'ca bi'raguë, re'oye yo'oye se'gare ro'taja'bë caguë, maire Cristo Jesusna te'e zi'in güeseye ro'tani, maire tëani re'huani jo'cabi baguë.

La paz que tenemos por medio de Cristo

¹¹ Ja'nca sëani, mësacua ja'anrë yo'ojën ba'ise'ere ro'tani, mësacua Cristo naconi yure mame re'huase'ere bojojën ba'ijë'ën. Mësacua yua judío bain jubë ba'ima'icua ba'ijënna, judío bainbi mësacuani ëñani, mësacuare cajën, Gu'ana'ë. Si'si yo'o bain'ë. Go neño ga'ni tÿyoma'isi'cua'ë, mësacuare cajën baë'ë. Ja'nca ba'icuaabi Riusu re'o bain, go neño tÿyosi'cua cajën ba'icuata'an, mësacua ba'ise'e'ru quë'rë re'o bain beohuë, ro ën yija bain ro'tajën yo'osi'cua sëani.

¹² Mësacuare ja'nca gu'aye cajën ba'icuata'an, mësacua yua Cristoni gare huesëcua ba'ijën ba'nhuë. Ja'nca ba'ijën, judío bain jubë naconi te'e ba'ie poremajën ba'nhuë. Judío bainbi Riusu ira coca toyani jo'case'e, baguë yo'oja'yete ro'tajënna, mësacuabi bacua naconi te'e ro'taye yëjën ba'icuata'an, Riusu bain mame re'huasi'cua ba'ie poremai'huë. Riusu coñete cato, mësacuare gare beoguë ba'nji.

¹³ Ja'nca ba'ise'eta'an, yureca Riusu te'e jubë bainreba re'huasi'cua ba'iyë mësacua. Cristo Jesusni huesëcua ba'isi'cuareta'an, yureca Cristobi mësacua gu'a jucha ro'ire junni tonguëna, baguë naconi Riusu te'e bain re'huasi'cua ba'iyë.

14 Ja'nca junni tonni, mai si'acuare te'e zi'in güeseni, maini sa'ñeña bojo güeseni, maini bají. Yëquëna hua'na judío bainbi yua mësacua judío bain jubë ba'ima'icua naconi sa'ñeña ai je'o bajën ba'isi'cua ba'ijëna, yureca maire sa'ñeña bojocuare re'huabi.

15 Cristo yua crusu sa'cahuëna junni tonguëna, judío bain ira coca guanseni jo'case'ere ro guaja yo'oye gare se'e ro'tamajën ba'iyë. Ja'nca ba'ijëna, Riusubi ba samu bain jubëan sa'ñeña je'o basi'cuare ëñaguë, ba samu jubëan ba'icua yequëcuare choini, baguë te'e jubë bainrebare re'huaní, sa'ñeña bojojën ba'i güesebi Riusu.

16 Gare se'e je'o bama'ija'bë caguë, baguë Zin Jesucristote ën yijana raoni crusu sa'cahuëna junni ton güesebi Riusu. Ja'nca junni tonguëna, mai si'acuabi te'e jubëna zi'inni, sa'ñeña recoyo te'e bojojën ba'iyë poreyë. Riusu bainreba te'e ba'iyë poreyë mai.

17 Cristobi ën yijana rani, si'a jubëan bainni baguë bojo güese cocare quëani achoguë, mësacua judío bain jubë ba'ima'icua, Riusuni huesëcuani, yëquëna're'ga Riusuni masicuaní, si'acuani te'e cocare quëani achoguë rají'i. Riusu coca zoe caní jo'case'e'ru yo'oguë rají'i.

18 Ja'nca raisi'quëbi quëani achoguë, Si'a bain jubëan ba'icua, judío bain, judío bain jubë ba'ima'icua, si'acuabi Riusu Raosi'quëreba ba'iguëni si'a recoyo ro'tatoca, Riusubi baguë Espíritute maina raoguëna, mai si'acuabi Taita Riusuna te'e ti'añe poreyë.

19 Ja'nca quëani achosi'quë sëani, yua tin bain gu'aye yo'ocua mësacuare gare se'e caye beoye

ba'iji. Riusubi mäsacuare choini, baguë te'e jubë bainreba ba'icua re'huani baji. Ja'nca re'huani baguë, baguë naconi te'e zi'in güeseni, baguë re'o bain jubëre mäsacuare re'huani baji.

²⁰ Riusure ta'yejeiye yo'o concua, baguë cocareba quëani achocua, ja'ancuabi cajën ye'yojënna, güina'ru ba'iji mäsacuare. Jesucristoni si'a recoyo ro'tareba ro'tajën, baguë naconi te'e zi'inni ba'ijën, Riusu bain jubëre carajeiye beoye re'huasi'cua ba'iyë.

²¹ Ja'nca re'huasi'cua ba'ijën, Cristona recoyo te'e zi'inni ba'ijën, baguë yo'o se'gare re'oye yo'o conjën, ën yija gu'a ëase'ere gare se'e ro'taye beoye ba'ijënna, Cristobi baguë re'o bainrebare mäsacuare quë'rë re'oye re'huani baji.

²² Re'huani baguëna, mäsacuabi baguë yo'o cuen-cuese'e se'gare yo'ojën, Riusu Espiritubi mäsacua naconi te'e ba'iguëna, mäsacua yua Riusu naconi quë'rë te'e ruiñe'ru recoyo zi'inni ba'ija'cua'ë.

3

Pablo encargado de llevar el evangelio a los judíos

¹ Yureca yë'ë yua Cristo Jesusni yo'o conguë ba'iguëbi baguë cocarebare mäsacua judío bain jubë ba'ima'icuan quëani achoguëna, yequëcuabi yë'ëre preso zeanni, yë'ëni bayë ënjo'on. Ja'nca preso zeansi'quëbi mäsacua ba'iyete Riusuni senguë ba'iyë yë'ë.

² Riusubi mäsacuani ta'yejeiye re'oye coñe ro'taguëna, mäsacua yua achahuë. Mäsacua yua judío bain jubë ba'ima'icua'eta'an, Riusubi

yë'ère cuencueni, mësacuani ta'yejeiye yo'o coñe guanseni saobi.

³ Ja'nca guanseni saoguëna, yë'ë'ga mësacuana coca toyani saoguë, baguë guansese'ere quëahuë. Baguë se'gabi mësacuani ta'yejeiye conza caguëna, mësacuana sani, baguë coñete mësacuana yo'oye ro'tayë yë'ë.

⁴ Ja'nca yo'oye ro'taguëna, mësacuabi yë'ë uti toyase'ere coní, ëñani, ja'n'rëbi, Riusu ta'yejeiye coñe, Cristo raose'ere caguë, ja'anre te'e ruiñe masija'cua'ë.

⁵ Baguëre ta'yejeiye coñete cato, ja'anrë ba'isi'cuani gare quëani achoma'iguë baji'i. Baguë se'gabi yahue masini, yurera baguëre ta'yejeiye yo'o concua, baguë cocarebare quëani achocua, ja'ancuani yurera masi güesebi Riusu. Baguë Espíritute raoni, baguë cuencuesi'cua se'gani masi güesebi.

⁶ Ja'nca masi güesequëna, yurera baguë ta'yejeiye yo'o coñete masiyë mai. Judío bain se'ga baguë bainreba cuencuesi'cua ba'ijënna, yurera si'a bain, judío bain jubë ba'ima'icua're'ga cuencueni baza caguë yo'o bi'raji Riusu. Si'a bain baguë Zin Jesucristoni si'a recoyo ro'tacua, ja'ancuabi baguë te'e jubë bainreba re'huasi'cua ba'ija'cua'ë. Ja'nca re'huasi'cua ba'ijën, si'a Riusu bayete judío bain naconi te'e coní baja'cua'ë. Bacua naconi te'e bojojën, Jesucristoni te'e zi'inni ba'ija'cua'ë. Riusu yua ja'anrë caní jo'casi'quëbi yurera ja'nca yo'o'ji.

⁷ Ja'an cocarebare mësacuani quëani achoguë ba'iyë yë'ë. Riusubi yë'ère cuencueni, baguë ta'yejeiye coñete yë'ëni masi güesequë, yë'ère ai re'oye yo'obi. Ja'nca yo'oguë, baguë ta'yejeiyereba

yo'oye poreguëbi baguëre ta'yejeiye yo'o conguëre yë'ëre re'hvani, mësacuana yë'ëre saobi.

⁸ Riusu bain jubë ba'icua'ru quë'rë yo'jereba ba'iguëreta'an, Riusubi yë'ëre cuencueni, mësacua judío bain jubë ba'ima'icuaana yë'ëre saobi. Ja'nca saoguëna, baguë cocarebare mësacuana quëani achoguë ba'iyë yë'ë. Cristoni si'a recoyo ro'tajën ba'itoca, baguë ta'yejeiye bayete ai ëama'iñereba carajeiye beoye mësacuana ro insini jo'caguë ba'ija'guë'bi.

⁹ Yeque cocare'ga si'a bainni masi güeseyë yë'ëre guansebi Riusu. Si'aye re'hvani jo'casi'quëbi yë'ëre guanseguëna, baguë yurera yo'oja'yete si'a bainni masi güeseyë yë'ë. Baguë yua ai ba'irën yo'oye ro'taguë, yurerën tēca bainni masi güeseyë beoguëbi yurera baguë cuencueni ro'tase'ere yo'o bi'raji Riusu.

¹⁰⁻¹¹ Ja'anre si'a ën yija bain, si'a guënamë re'oto quë'rë ta'yejeiye ëjacuare'ga, si'acuani masi güesejë'ën cabi. Yë'ë bainreba jubëni ëñani, yë'ë masireba masini yo'ose'ere ye'yejë'ën caji. Si'a bain, judío bain jubë ba'icua, judío bain jubë ba'ima'icua, si'acuabi Cristo Jesusni si'a recoyo ro'tani baguë yëye se'ga yo'ojën ba'icua, ja'ancuare yë'ë bainreba jubëre re'hvani bayë yë'ë, caji. Ja'nca re'hvani baguëna, mësacua ëñani, yë'ë masireba masiye re'hvani jo'case'ere ye'yejë'ën. Ja'anre si'arën yo'oye ro'tahuë yë'ë, caji.

¹² Ja'nca caguë, baguë bainre maire re'huaguëna, yureca baguëni gare huaji yëye beoye ba'iyë poreyë mai, baguëni si'a recoyo ro'tajën ba'icua sëani. Mai yëye ba'irën baguëna ti'anni coca senni achajënna, bëinma'iji. Maire gare

etoni saoye beoye ba'iji Riusu.

¹³ Ja'nca sĕani, yĕ'ĕbi mĕsacuani oire bani conza caguĕ, ai yo'oguĕna, ja'nji recoyo bacuare re'huaye beoye ba'ijĕ'ĕn. Quĕ'rĕ jĕja recoyo re'huani ba'ijĕ'ĕn. Yĕ'ĕbi ai yo'oguĕ ba'iguĕta'an, mĕsacua yua quĕ'rĕ ta'yejeiye ba'icua ba'ija'cua'ĕ.

El amor de Cristo

¹⁴ Ja'nca sĕani, mai Taita Riusuni si'a recyobi senreba senguĕ ba'iyĕ yĕ'ĕ.

¹⁵ Si'a ĕn yija bain, si'a guĕnamĕ re'oto ba'icua're'ga, si'acua baguĕ bainrebare re'huani basi'cua, ja'ancuare senreba senguĕ ba'iyĕ yĕ'ĕ.

¹⁶ Si'ayete baguĕre sĕani, baguĕni senreba senguĕ, baguĕ Espĕritu bacuare mĕsacuare re'huajĕ'ĕn, cayĕ yĕ'ĕ. Ja'nca re'huani, mĕsacua huaji yĕye beoye ba'icua're'huaji. Jĕja recyoreba bacuare re'huaji mĕsacuare.

¹⁷ Mĕsacuabi Cristoni si'a recoyo ro'tani ba'ijĕn, Cristo yua mĕsacua naconi te'e ba'iguĕ, yua baguĕ ba'iyete quĕ'rĕ ai ba'iyĕ mĕsacuani masi gĕeseji. Baguĕ yua mĕsacuani ai yĕreba yĕguĕna, mĕsacua yua baguĕ ba'iyete quĕ'rĕ te'e ruiĕne masini, baguĕni quĕ'rĕ se'e recoyo zi'inni ba'iyĕ.

¹⁸ Ja'anre Riusuni senreba senguĕ, mĕsacua Cristoni zi'inni ba'iyĕ, ja'anre mĕsacuani quĕ'rĕ ai ba'iyĕ masi gĕesejĕ'ĕn seĕĕ. Si'a Riusu bainreba jubĕ naconi Cristoni te'e zi'inni ba'iyĕ cato, ai ta'yejeiyereba ai re'oye ba'iji maire. Ai ĕama'iĕnereba ro'tajĕn ba'icua'reta'an, Riusubi ja'an re'oye ba'iyete mĕsacuani masi gĕeseye poreji. Ja'an yo'oyete Riusuni senguĕ ba'iyĕ yĕ'ĕ.

19 Riusubi mäsacuani ai ba'ie ai carajeiye beoye ai yëreba yëguë, ja'an ai yëyete mäsacuani masi güesejë'en señe yë'ë. Baguë ta'yejeiyereba ba'iyete mäsacuani te'e ruiñe masi güesejë'en señe yë'ë.

20-21 Mai Taita Riusu yua ai ta'yejeiyereba pore Eǵaguëte sëani, baguëni ai bojoreba bojojën cañuni. Baguë yo'oye poreyete cato, re'oye masiye caraji maire. Baguë cuencueni ro'tase'ere yo'oto, baguë bainreba jubë Jesucristo naconi te'e ba'ijëna, baguë yëye'ru ai ta'yejeiyereba mai jubë si'acuani yo'o güeseye poreji Riusu. Ja'nca yo'o güeseye poreguëna, baguëni gare jo'caye beoye ai ba'ie ai ta'yejeiye bojojën cañuni. Amén.

4

Unidos por el Espíritu

1 Riusubi mäsacuani ja'nca ta'yejeiye yo'o güeseye yëguë sëani, yë'ë yua preso zeansi'quëta'an, Riusu yo'o coñe ba'iguëbi mäsacuani si'a jëja yihuoguë ba'iyë. Mäsacua yua Riusu te'e bainreba re'huasi'cua sëani, baguë yëye se'gare te'e ruiñe yo'ojën ba'ijë'en.

2 Yequëcua naconi ba'ijën, bacua ba'ie'ru quë'rë yo'je hua'na'ru ëñojën, bacuani re'oye yo'ojën ba'ijë'en. Bacuabi huacha yo'otoca, bacuani bëinmajën, bacua yëyete ro'tajën, bacuani oire bajën conjë'en.

3 Riusu bainreba jubë ba'icua, si'acuani conjën, bojo güeseye ro'tajën ba'ijë'en. Mäsacua si'acua yua Riusu Espirituna te'e zi'inni ba'icua sëani, Riusubi ja'nca yëji.

⁴ Riusu bainreba ba'i jubë yua te'e jubë ba'icua'ë mai. Ba'ijënna, Riusu Espíritubi mai si'acuani gaje meni baji. Mai si'acua Jesucristo choisi'cua ba'ijën, baguëni recoyo te'e zi'inni ba'icuabi baguë naconi carajeiye beoye ba'ija'cua ba'ijën, te'e ëñajën ëjojën ba'iyë mai.

⁵ Mai si'acuabi mai Ëjaguëreba se'gani recoyo te'e ro'tajënna, baguë Espíritubi maina gaje meni baguë, mai recoyore tënoto, gare te'e tënosi'cua ba'iyë mai.

⁶ Ja'nca te'e tënosi'cua ba'ijënna, mai Taita Riusubi baguë mamacuare maire te'e re'huanu baji. Ja'nca baguëbi mai ta'yejeiyereba Ëjaguë ba'iji. Si'aruan ba'iguëbi mai si'acua naconi gare jo'caye beoye te'e ba'iji.

⁷ Mai naconi ja'nca te'e ba'iguëbi baguë bainreba jubë ba'icua, ga bainguëni tin yo'o coñe, maini ta'yejeiye yo'o güeseji. Cristobi yo'o güesequëna, ga bainguëbi tin yo'ore yo'oye poreguëna, si'a jubëbi sa'ñeña te'e conjën ta'yejeiye yo'ojën ba'iyë.

⁸ Riusu coca toyani jo'case'ere ëñato, ñaca caji:
Baguë yua guënamë re'otona mëiguë saiguë, ai ta'yejeiye yo'oguë, baguëre je'o bacuani ñu'ñojeija'guëbi.

Ja'nca yo'oguëbi baguë bainni ta'yejeiye yo'o yo'oye porecuare re'huaguëna, ga bainguëbi tin yo'o yo'oye poreja'guë'bi, toyani jo'case'e ba'iji.

⁹ Yureca mëiguë saija'guë'bi caguëna, mësacua yua ja'an cocare ro'tani ye'yejë'ën. Ru'ru, ën yijareba tëca gajeye babi baguë.

10 Ja'nca gajeni ba'ini, ja'nre'bi se'e guënamë re'otona mëji'i. Ja'nca mëisi'quëbi yua guënamë re'oto si'a re'otoreba quë'rë ta'yejeiye E'jaguë re'huasi'quë baji'i. Ja'nca ba'iguëbi, baguë cani jo'case'e'ru yo'oguë, si'a baguë bainre ta'yejeiye yo'o yo'oye porecuare re'huabi.

11 Ja'nca re'huaguëna, yequëcuabi baguëre ta'yejeiye yo'o conjën, baguë bainreba jubë si'a jubëte ëñajën cuirajën ba'iyë. Yequëcuabi baguë cocarebare bainni masi güesejën ba'iyë. Yequëcuabi si'a huë'e joboñana ganijën baguë cocarebare quëani ahojën ba'iyë. Yequëcuabi te'e huë'e jobo bain jubëte ëñajën, Riusu cocarebare ye'yojën ba'iyë.

12 Ja'nca ta'yejeiye yo'o güesebi Cristo. Yë'ë bainreba ba'icua'bi yë'ë ba'iyete re'oye ye'yejën, sa'ñeña re'oye conni cuiraye masijën, si'a jubëbi quë'rë jëja recoyo re'huani jaijeija'bë caguë, baguë bainni ta'yejeiye yo'o güesebi.

13 Ja'nca sa'ñeña conni cuirajën, si'a jubëbi Riusu Zin Cristoni si'a recoyoreba te'e ruiñe ro'tajën ba'ija'cua'ë. Cristobi ru'ru maini re'oye yo'o conguëna, mai si'a jubëbi güina'ru yo'ojën, baguë yo'ore ta'yejeiyereba yo'o conjën ba'ija'cua'ë.

14 Ja'nca ba'ijën, baguë ba'iyete ye'yema'isi'cua'ru gare se'e ba'ima'inë cajën ba'iyë. Baguë ba'iyete huesëjën ba'itoca, yequëcuabi tin yihuojënna, ro huesë ëaye recoyo te'e ruiñe ro'taye porema'inë. Yogu tayoye huesëjën ba'itoca, sao ziyabi bacuare ro memoji. Ja'nca huesëcua'ru huesëjën, si'a bain ro re'o coca cacuani achajën, ro coque güesejën ba'iyë. Ja'nca ba'ijënna, ba coquecuabi

bacua bayete ro tēani bayē. Ja'nca coque güesejēn ba'itoca, Riusubi yēma'iji.

¹⁵ Mai yo'o yo'oye cato, ñaca yēji Cristo. Baguē cocareba cani jo'case'ere te'e ruiñe cajēn, sa'ñeña oijēn conjēn, baguē masiye'ru re'oye masijēn, baguē ba'iyē'ru güina'ru ba'ijē'ën, caji Cristo. Baguēbi caguēna, te'e ruiñe achani, Jaē'ë cajēn, güina'ru yo'ojēn ba'ijē'ën. Baguē yua mai ta'yejeiyereba Ējaguēre sēani, baguē ba'iyē'ru te'e ba'ijē'ën.

¹⁶ Ja'nca ba'itoca, baguē bainreba jubē si'a jubēbi baguē naconi quē'rē se'e te'e zi'inni ba'ijēn, quē'rē jēja recoyo bacua re'huajēn ba'ija'cua'ë. Baguē yēye'ru te'e yo'ojēn, baguē ta'yejeiye yo'o conjēn, sa'ñeña oire bajēn cuirajēn, recoyo quē'rē re'oye te'e zi'inni ba'ija'cua'ë mai.

La nueva vida en Cristo

¹⁷ Yureca, mai Ējaguē yihuoye'ru, mēsacuani si'a jējareba yihuoguē ba'iyē yē'ë. Gu'a bain, Riusure huesēcua, ja'ancua yo'ojēn ba'iyē'ru gare se'e yo'oye beoye ba'ijē'ën. Bacua yo'o yo'oye ro'tayete cato, ro ro'tajēn, ro yo'ojēn ba'iyē.

¹⁸ Riusu yēyete gare ro'taye beoye ba'ijēn, baguēre yo'o coñe gare yo'omajēn ba'iyē. Ja'nca sēani, baguē ba'iyete huesējēn, baguēni te'e zi'ñe beoye ba'ijēn, zijei re'oto se'gare ro rēnni ganojēn ba'iyē.

¹⁹ Re'oye yo'oyete cato, bacua yua yo'oye gare huesēcua'ru ruincua se'ga ba'ijēn, si'a bacua gu'a ēase'e se'gare yo'oñu cajēn, gare jo'caye beoye gu'ajeijēn ba'iyē bacua.

²⁰ Mēsacuaca Cristo ba'iyete ja'nca ye'yemaē'ë.

21 Mësacua yua Cristo cocarebare te'e ruiñe achajën, baguë ba'iyete te'e ruiñe ye'yejën ba'itoca, gu'a bain yo'oye'ru gare yo'oye beoye ba'iyë mësacua.

22 Ja'nca sëani, mësacua ja'anrë yo'ojën ba'ise'ere gare jo'cani senjojë'ën. Ja'nca yo'ojën ba'isi'cuabi Riusu bënni senjoja'cua se'ga ba'ijën ba'nhuë. Mësacua yua ro ro'tajën, gu'aye yo'oye se'gare yo'ojën ba'nhuë.

23 Ja'nca yo'ojën ba'isi'cuabi yureca mame recoyo re'hua güesejë'ën. Mame re'hua güeseni, ja'nrebi mësacua ba'iyë si'aye Riusu ba'iyë'ru te'ereba ba'iyë.

24 Ja'nca ba'icuabi Riusu cuencueni re'huani jo'case'ere ye'yejën, baguë ru'rureba yëse'ere ye'yejën, baguë yëye'ru re'oye yo'ojën, baguë bainreba yo'oye cuencuese'ere te'e ruiñe yo'oye se'ga ro'tajën ba'ijë'ën.

25 Ja'nca ba'icua sëani, gare se'e coquemajën ba'ijën, si'a bainni te'e ruiñe se'ga cajën ba'ijë'ën. Mai jubë si'acua yua Cristoni recoyo te'e zi'inni ba'icua sëani, ja'nca yo'ojën ba'ijë'ën.

26 Yequëni bëintoca, baguëni gu'aye yo'oye beoye gare ba'ijë'ën. Baguëni bëiñe ja'ansi umuguse jo'cani se'e ro'tama'ijë'ën.

27 Ja'nca yo'oma'itoca, zupai huatibi mësacuani zeanni toñe poreji. Ja'nca sëani, baguë coqueyete jëani, mësacua bëinjën ba'iyete jo'cani se'e ro-tama'ijë'ën.

28 Bonsere jianjën ba'isi'cua banica, gare se'e jiañe beoye ba'ijë'ën. Re'o yo'o yua si'a jëja te'e ruiñe yo'ojën, mësacua curi te'e ruiñe cojën

ba'ijë'ën. Coni, ja'nrëbi bonse caracuana ro insiye poreja'cua'ë.

²⁹ Gu'a coca caye beoye ba'ijë'ën. Yequëcuani cocare cato, re'o coca se'gare cajën ba'ijë'ën. Bacuani bojo güeseza cajën, bacuani re'oreba coca se'gare cajën ba'ijë'ën. Ja'nca cajën ba'itoca, Riusubi bacuani quë'rë re'ojei güeseni, bacuani quë'rë re'oye coñe poreji.

³⁰ Ja'nca sëani, gu'a cocare caye beoye ba'ijën, Riusu Espírituni sa'nti güeseye beoye ba'ijë'ën. Mësacua yua Riusu Espírituni te'e zi'inni ba'icuabi Riusu bain tëani baja'yete te'e ruiñe masijën ba'iyë. Ja'nca sëani, Espírituni sa'nti güeseye beoye ba'ijë'ën.

³¹ Gare gu'aye yo'oye senjoni ba'ijë'ën. Yequëcuani gu'aye yo'omajën ba'ijë'ën. Yequëcuani sa'nti güeseye beoye ba'ijë'ën. Yequëcuani bëiñe beoye ba'ijë'ën. Yequëcuani gu'aye caye beoye ba'ijë'ën. Yequëcuani je'o cocare caye beoye ba'ijën, bacua gu'aye yo'ose'ere je'o caye beoye ba'ijë'ën.

³² Ja'nca caye beoye ba'icuabi re'o coca se'gare cajën ba'ijë'ën. Yequëcuani oire bajën bojo güeseye cajë'ën. Bacua gu'aye yo'ose'ere gare se'e ro'tama'iguë'ë yë'ë, bacuani cajë'ën. Mësacua gu'aye yo'ojën ba'ise'ere cato, Cristobi ja'an ro'ire junni tonguëna, Riusubi gare se'e ro'tama'iguë ba'iji.

5

Cómo deben vivir los hijos de Dios

¹ Mēsacua yua Riusu mamacua ai yēsi'cua sēani, Riusu ba'iyē'ru ba'iyē ro'tajēn ba'ijē'ën.

² Ja'nca ba'ijēn, yequēcuanī jo'cayē beoyē oire bajēn conjēn, bacuani ai yējēn ba'ijē'ën. Cristobi maini oire baguē conse'e'ru yequēcuanī gūina'ru yo'ojēn ba'ijē'ën. Baguē yēyete yo'oza cama'iguēta'an, mai ro'ire crusu sa'cahuēna junni senjosi'quē bajī'i. Ja'nca ba'iguēna, Riusubi ēñani, Cristo ai yēguē yo'ose'ere re'oye ro'tani, baguē ai bojobi.

³ Mēsacua yua Riusu bainreba re'huasi'cua sēani, ěmēcua romicua sa'ñeña yahue bani a'ta yo'oye, ja'anre yēni yo'oye, si'a gu'a ěase'ere cato, gare ro'tayē beoyē ba'ijē'ën. Riusu bainreba ba'icua bi ja'anre sa'ñeña coca cayē beoyē gare ba'ijē'ën, gu'ana sēani.

⁴ Gūina'ru sa'ñeña gu'a coca cayē beoyē ba'ijēn, ro cayē beoyē ba'ijēn, ro huere cocabi yequēcuanī sa'nti gūeseyē beoyē ba'ijē'ën. Yequēcua ba'iyete coca cato, re'o coca se'gare cajēn, bacuare Riusuni surupa cajēn ba'ijē'ën.

⁵ Ĕn coca yua te'e ruiñe ba'i cocare sēani, gare huanē yeyē beoyē ba'ijē'ën. Ĕmēcua romicua sa'ñeña yahue bani a'ta yo'ojēn ba'icua, ja'an yo'oye ro'tacua, bacua ro gu'a ěase'e se'gare ro'tajēn ba'icua, ja'an si'acuabi Riusu ba'i jobona gare ti'añe beoyē ba'ija'cua'ë. Bonse ba ěayē ba'icua'ga gare ti'añe beoyē ba'ija'cua'ë. Ja'ancua yua Riusuni gu'a gūecua ba'iyē. Ja'nca ba'icua bi Riusu bainreba jubē, Cristo naconi te'e ba'icua, gare carajeyē beoyē ba'icua, ja'ancuana gare ñē'cayē porema'iñē.

6 Ja'nca sĕani, mĕsacua yua ĕñare bajĕn, bain coqueuani achamajĕn ba'ijĕ'ĕn. Re'oye achoye cacuata'an, ro coqueye se'gare yo'ojĕn ba'iyĕ. Ja'nca gu'aye yo'ojĕn, Riusuni ro achajĕn, zupai huatire concua se'ga ba'iyĕ. Ja'nca ba'ijĕnna, Riusubi bacua si'acuani ai bĕnni senjoja'guĕ'bi.

7 Ja'nca bĕnni senjoja'guĕ ba'iguĕna, mĕsacua ĕñare bajĕn, bacuana gare zi'iñe beoye ba'ijĕ'ĕn.

8 Mĕsacua ja'anrĕ yo'ojĕn ba'ise'ere cato, bacua yo'ojĕn ba'iyĕ'ru gĕina'ru yo'ojĕn ba'nhuĕ. Ro zijei re'otore rĕnni ganojĕn ba'nhuĕ. Riusure gare huesĕcua ba'ijĕn ba'nhuĕ. Ja'nca ba'isi'cuabi yureta'an Cristoni si'a recoyo ro'tajĕn ba'icuabi Riusuni masini si'ani, mia re'oto se'gare ganijĕn ba'iyĕ mĕsacua. Ja'nca ba'icuabi yequĕcua ni ja'an mia re'oto ganiñete masi gĕeseza cajĕn, Riusu yo'oguĕ ba'iyĕ'ru re'oye yo'ojĕn ba'ijĕ'ĕn.

9 Ja'nca yo'ojĕn ba'ijĕn, Riusu bainreba ba'iyete masi gĕesejĕnna, si'acuabi ĕñani, mĕsacua te'e ruiñe yo'ojĕn ba'iyĕ, mĕsacua re'oye yo'ojĕn ba'iyĕ, Riusu yĕye'ru yo'ojĕn ba'iyĕ, ja'anre ĕñani masiyĕ.

10 Ja'nca sĕani, mĕsacua yo'ojĕn ba'iyete cato, mai Ējaguĕ yĕyete ro'tajĕn, jo'caye beoye te'e ruiñe yo'ojĕn ba'ijĕnna, bague yua mĕsacuani ĕñani bojoi.

11 Gu'a bain zijei re'otona ro rĕnni ganoñete cato, bacua ro yo'ojĕn ba'iyĕ'ru gare yo'oye beoye ba'ijĕ'ĕn. Ja'nca ba'icuabi bacua ro gu'aye yo'ojĕn ba'iyete bacuani masi gĕesejĕn ba'ijĕ'ĕn.

12 Bacua gu'aye yo'ojĕn, bacua yahue yo'ojĕn ba'iyete ro'tato, sa'ñeña cani achoye beoye ba'ijĕ'ĕn, gu'ana sĕani.

13 Yureca, mai hua'na Riusu bainreba ba'icuabi

baguë yëyete yo'ojën, Riusu ba'iyete yequëcuani ai miañe ëñojën, bacua zizei re'oto rënni ganojën gu'aye yo'oyete bacuani masi güeseyë mai.

¹⁴ Mësacua yua ën coca cani jo'case'ere ro'tajën, ja'anre te'e ruiñe masijë'ën:

Cainsi hua'guë sëta raiye'ru, ju'insi hua'guë go'ya raiye'ru, ja'an'ru ba'iguëbi zizei re'otobi sani, mia re'otona eta raijë'ën.

Ja'nca raiguëna, Cristobi mia re'otore më'ëni te'e ruiñe gani güeseji.

Baguë ba'iyete më'ëni te'e ruiñe masi güeseji.

Ja'nca cani jo'case'e ba'iguëna, mësacua yua Riusu ba'iyete yequëcuani ai miañe ëñojën, bacuani masi güesejën ba'ijë'ën.

¹⁵ Ja'nca sëani, mësacua ëñare bajën, Riusuni masicua yo'ojën ba'iyë'ru caraye beoye yo'ojën ba'ijë'ën. Riusuni huesëcua yo'ojën ba'iyë'ru gare yo'oye beoye ba'ijë'ën.

¹⁶ Ën yija bainbi jo'caye beoye gu'aye yo'ojën ba'icua sëani, mësacua porese'e'ru si'arën re'oye yo'ojën ba'ijë'ën.

¹⁷ Ja'nca sëani, mësacua yua ro ro'tani yo'oye beoye ba'ijë'ën. Riusu yëyete jo'caye beoye masiye ro'tajën, baguë yo'o se'gare yo'ojën ba'ijë'ën.

¹⁸ Mësacua yua jo'chana gare güebeye beoye ba'ijë'ën. Ja'nca güebetoca, si'arën gu'aye se'gare yo'o bi'rayë. Riusu Espíritu gaje meni bañu cajën, ja'an se'gare ro'tajën ba'ijën, baguë bojo güeseyë'ru bojojën ba'ijë'ën.

¹⁹ Ja'nca bojojën, yequëcuani bojo güesejën ba'ijë'ën. Mai Eñaguë ba'iyete bacuani bojoye yihuojën, si'a ganta cocabi baguë ta'yejeiye

ba'iyete bojoreba bojojën cani achojën, bojo reconoa sa'ñeña te'ereba re'huani ba'ijë'ën.

²⁰ Ja'nca bojojën ba'ijën, mësacua yua si'aye mai Taita Riusu ro insini jo'case'ere ro'tajën, gare jo'caye beoye baguëni surupa cajën ba'ijë'ën. Mai Ëjaguë Jesucristo maire oireba oiguë conguë ba'ise'ere ro'tajën, ja'nca bojojën, Riusuni surupa cajën ba'ijë'ën.

La vida familiar del cristiano

²¹ Yureca mësacua yua Cristo ta'yejeiyereba ba'iyete ro'tajën, baguëni caraye beoye achani baguë yo'ore yo'ojën, güina'ru sa'ñeña ba'iyete ro'tajën, mësacua bain'ru quë'rë yo'je ba'icua'ru bacuani ënojën, bacuani re'oye ëñajën ba'ijë'ën.

²² Romicua, mësacua yua Cristo ta'yejeiyereba ba'iyete ëñajën, baguë cayete achani Jaë'ë cajën, güina'ru mësacua ënjë ta'yejeiye ba'iyete ëñajën, baguë cayete achajën Jaë'ë cajën, baguëni yo'o conjën ba'ijë'ën.

²³ Mësacua ënjë yua mësacua ëjaguëre sëani, baguëni ja'nca yo'o conjën ba'ijë'ën. Cristo ba'iyete cato, baguë yua güina'ru si'a baguë bainreba jubë Ëjaguëbi ba'iji, bacuani tëani baguë sëani.

²⁴ Riusu bainreba jubë si'acuabi Cristo ta'yejeiyereba ba'iyete ëñajën, baguë cayete achajën, te'e ruiñe yo'ojënna, güina'ru mësacua romicua yua mësacua ënjë ta'yejeiye ba'iyete ëñajën, baguë cayete achajën, te'e ruiñe yo'ojën ba'ijë'ën.

²⁵ Ëmëcua, mësacua yua mësacua rënjoni ai oire bajën conjën, bagoni ai yëreba yëjën ba'ijë'ën. Cristobi baguë bainreba jubëte ai oire baguë,

Bacuare tēani baza caguë, bacua ro'ire junni toñe tēca bacuani ai yēreba yēguë bajj'i. Ja'nca ai yēreba yēguëna, mēsacua rēnjore'ga güina'ru ai yēreba yējēn ba'ijē'ën.

²⁶ Cristobi baguë bainrebare ëñaguë, Gare gu'a jucha beocuare bacuare re'huani baza caguë, baguë cocarebare maini masi güeseguë, mai re-coñoare tēnoreba tēnoguë bajj'i.

²⁷ Ja'nca maire tēnoguë, Yē'ë bainreba jubē yua ai re'oye ba'icua re'huani, gare si'si re-coñoa beocuare bacuare ta'yejeiyereba re'huani baza caguë, maini ai oireba oiguë, maini ai yēreba yēguë, mai ro'ire junni tonbi baguë.

²⁸ Cristobi ja'nca maini ai yēreba yēguëna, mēsacua ëmēcua'ga güina'ru mēsacua rēnjoni ai yēreba yējēn ba'ijē'ën. Mēsacua carajēn ba'iyete ro'tani, mēsacua ja'ansi'cua ja'an ba'iyete baye ro'tajēn, mēsacua rēnjo carago ba'iyete güina'ru ro'tani, bagoni cuirajēn ba'ijē'ën. Bago yua mēsacua naconi te'e zi'inni ba'igore sēani, bago carago ba'iyete re'oye ro'tani, bagoni cuirajēn ba'ijē'ën.

²⁹ Bago yua mēsacua naconi te'e zi'inni ba'igona, bago aon, bago caña, si'aye bagoni cuirajēn ba'ijē'ën. Mēsacua ja'ansi'cua aon, caña, ja'anre carato, mēsacuabi cu'eye güema'icua'ë. Güina'ru mēsacua rēnjo carago ba'iyete te'e ruiñe cu'ejēn ba'ijē'ën. Cristobi baguë bainreba carajēn ba'iyete te'e ruiñe cuiraye'ru, mēsacua güina'ru yo'ojēn ba'ijē'ën.

³⁰ Si'a jubē yua Cristoni te'ereba zi'inni ba'icua sēani, maini ai re'oye cuirani conji.

³¹⁻³² Ja'an te'e zi'inni ba'iyete cato, mēsacua yua

ja'anre re'oye ye'yeye ti'anma'itoca, Riusubi si'a bainni ja'anre masi güesema'iji. Baguë coca cani jo'case'ere achani ro'tajë'ën: “Yureca, ëmëcuabi bacua pë'caguëte pë'cagote gare jo'cani, bacua rënjoni te'e zi'inni ba'ijë'ën. Ja'nca ba'ijëna, ba samucuabi te'e bainguë ba'iyë'ru ba'iyë.” Ja'an coca cani jo'case'ere ro'tani, Cristo re'huase'ere ye'yejë'ën. Cristobi baguë bainreba jubëte maire re'huani, maini te'e zi'inni, baguëre yo'o concuare maire re'huani baji.

³³ Mësacua ni ja'nca cani achoguë, ñaca'ga mësacua ni yihuoguë cayë yë'ë. Mësacua ëmëcu yua ja'ansi'cua ba'iyete ro'tani cuiraye'ru mësacua rënjoni güina'ru ro'tani, bagoni ai ba'iyë ai yëreba yëjën ba'ijë'ën. Mësacua romicua yua mësacua ënjë ta'yejeiye ba'iyete ëñajën, baguë cayete achajën, Ja'ë cajën, yo'ojën ba'ijë'ën.

6

¹ Mësacua zin hua'na yua Cristo ta'yejeiye ba'iyete ëñajën, baguë cayete achajën, te'e ruiñe yo'ojën, güina'ru mësacua pë'caguë sanhuë cayete achajën, te'e ruiñe yo'ojën ba'ijë'ën. Riusubi ja'an yo'oyete mësacua ni guanseni jo'cabi.

²⁻³ Ën cocare ro'tani masijë'ën: “Mësacua pë'caguëni pë'cagoni te'e ruiñe ëñajën ba'ijë'ën. Ja'nca ëñajën ba'itoca, mësacua ën yija ba'i umuguseña yua ai zoe ba'ijën, ai bojojën ba'iyë” guanseni jo'cabi Riusu. Ja'nca cani jo'caguë, ai ta'yejeiye ba'i coca sëani, baguë bainni guanseni, baguë bojo güeseja'yere'ga quëabi. Ja'nca sëani, ja'an coca guanseni jo'case'ere ro'tajën, mësacua pë'caguë sanhuëni re'oye achajën ba'ijë'ën.

4 Mësacua ëmëcua yua mësacua zin hua'nani hui'ya yo'omajën, bacuani bëin güeseye beoye ba'ijë'ën. Mai Ëjaguë yëye se'gare yo'ojën, bacuani ai oire bajën ye'yoni yihuojën, bacuani bojora'rë si'nsejën irojën ba'ijë'ën.

5 Yureca, mësacua ëja bainni yo'o conjën, bacuabi yo'o cajënna, mësacua ëñare bajën, bacua cayete achajën, te'e ruiñereba re'oye yo'ojën ba'ijë'ën. Cristo cayete achani yo'oye'ru güina'ru mësacua ëja bain cayete te'e ruiñe achani, re'oye yo'ojën ba'ijë'ën.

6 Mësacua ëjaguëbi ëñaguëna, ja'anrën se'gabi baguë yo'ore re'oye yo'otoca, mësacua yua gu'aye yo'oyë, bainguë ëñani bojoye se'gare ro'tacua sëani. Mësacua ëjaguë yo'ore conjën, gare jo'caye beoye si'a recoyobi re'oye yo'o yo'ojën ba'ijë'ën. Cristo yo'o coñe'ru güina'ru bain ëjaguë yo'o conjën ba'ijë'ën. Ja'nca yo'ojën ba'itoca, Riusubi mësacuani ëñani bojoji.

7 Mësacua ëjaguëni re'oye yo'o conjën, Cristoni bojojën ba'ijë'ën. Bain ëñani bojoyete gare ro'taye beoye ba'ijën, Cristo ëñani bojoye se'gare ro'tajën ba'ijë'ën.

8 Mai Ëjaguë Riusubi si'a bainni ëñani, bacua ta'yejeiye ba'iyete ro'tama'iguë, bacua re'oye yo'o yo'ose'ere masini, ga bainguëni re'oye ro'ija'guë'bi, bacua re'oye yo'ose'e'ru ba'ie.

9 Mësacua yua ëja bain ba'ijën, yo'o concuare bajën, bacuani re'oye yo'ojën ba'ijë'ën. Yua mai ta'yejeiye Ëjaguë Cristo guënamë re'otore ba'iguë, baguë yua mësacua ba'iyete ëñaguë, mësacua yo'o concua'ru quë'rë ta'yejeiye beoyë mësacua caji.

Ja'nca sĕani, mĕsacua yo'o concuare guanseto, bacuani gu'aye caye beoye bajĕn, bacuani je'o coca caye beoye ba'ijĕ'ĕn.

Las armas espirituales del cristiano

10-11 Yureca, mĕsacuani ñaca yihuoni tĕjiyĕ yĕ'ĕ. Riusubi zupai huatini guerra huaguĕna, mĕsacua yua Riusure yo'o concua cuencuesi'cua ba'iyĕ. Ja'nca sĕani, jĕja recoyo re'huaye re'oye ye'yejĕ'ĕn. Riusubi ta'yejeiye yo'oye porecuare mĕsacuare re'huaye poreguĕna, Riusu yo'oye pore gĕseyete si'a jĕja ro'tajĕn ba'ijĕ'ĕn. Zupai huatibi ai masiye coqueguĕna, mĕsacua yua Riusu ta'yejeiye poreyete ro'tajĕn ba'ijĕ'ĕn. Ja'nca ro'tama'itoca, zupaini ta'yejeiye ĕnseye gare porema'iĕĕ mĕsacua.

12 Ñaca'ga ro'tani masijĕ'ĕn. Gu'a bain hua'na ga'nihuĕan bacuani huama'iĕĕ mai. Zupai huati, baguĕre yo'o concua si'acua, ja'ancuani, guerra huajĕn ba'iyĕ mai. Bacua yua si'aruanre ganijĕn, maini coque ĕaye yo'ojĕn ba'iyĕ. Ĕn yijare ba'ijĕn, ma'tĕmĕ re'otore ba'ijĕn, bain recoĕoare'ga ba'ijĕn, gu'aye guanseyĕn ba'iyĕ si'a huati jubĕan.

13 Zupaire concua yua ai jai jubĕ ba'ijĕnna, zupaibi bacuani ta'yejeiye guanseyĕ ba'iji. Ja'nca ba'iguĕbi Riusu bainni huani tĕjiza caguĕ, baguĕ yua Riusu, Riusu bainreba ba'icua, si'a jubĕni ai ta'yejeiye je'o bani huaja'guĕ'bi. Ja'nca huaguĕna, Riusubi mĕsacuani ta'yejeiye yo'o gĕseyeguĕna, mĕsacua yua jĕja recoĕoa re'huaye te'e ruiĕe ye'yejĕ'ĕn. Ja'nca ye'yetoca, zupai huatibi mĕsacuani tĕani senjoĕe porema'iji. Mĕsacua yua Riusu yo'oye porecuaru re'huasi'cuabi si'a

jëja huajën, zupai concua'ru quë'rë ta'yejeiye ba'ija'cua'ë.

¹⁴ Ja'nca jëja bajën, zupai jubëni guerra hua bi'rajën, Riusu cocareba case'e'ru te'e ruiñe yo'ojën ba'ijë'ën. Ja'nca yo'ojën ba'itoca, mësacua yua si'a jëja yo'oye porejën, zupai jubëni huaji yëye beoye ba'iyë. Riusu yëye'ru te'e ruiñe yo'ojën ba'ijëna, zupaibi mësacua gu'a coca caye gare porema'iji.

¹⁵ Riusu cocarebare si'a bainna jo'caye beoye quëani ahojën ba'ijë'ën. Ja'nca yo'ojën ba'itoca, ai jai jubë bainbi Riusuni huaye jo'cajën, Riusuni te'e zi'inni ba'iyë.

¹⁶ Ja'nca re'oye yo'ojën, Cristoni si'a recoyo ro'taye gare jo'caye beoye ba'ijë'ën. Zupai huesoni senjoñete jëaye ba'icua sëani, baguë toa ya'rire mësacuana cha'coni saoye gare porema'iji. Mësacua ai gu'a coca caguëta'an, mësacua huesoni senjoñe gare porema'iji.

¹⁷ Mësacua yua Riusu bain tëani bacua sëani, Riusu tëani base'ere huanë yeye beoye ba'ijë'ën. Ja'nca ba'itoca, zupai huatibi mësacua tëani baye gare porema'iji. Riusu cocarebare'ga quë'rë ai ba'iyë ye'yejën, Riusu Espíritubi conguëna, quë'rë se'e ba cocarebare quëani ahojën ba'ijë'ën. Ja'nca ba'itoca, zupaibi mësacua tëani baza caguëta'an, gare jëja baguë yo'oye porema'iji.

¹⁸ Mësacuabi ja'nca jëja bajën, Riusu Espíritubi mësacua sen güeseye'ru Riusuni si'a jëja jo'caye beoye senjën ujajën ba'ijë'ën. Riusu bain jubë si'a jubëbi sa'ñeña ujajën, Riusuni senreba senjën, zupai jubëni huajën ba'iyë. Ja'nca ba'icua sëani, mësacua yua gare jo'caye beoye Riusuni senjën

ba'ijë'ën.

¹⁹ Yë'ëre'ga si'a jëja senreba senjën ba'ijë'ën. Yequëcuani Riusu cocarebare quëani achoye poreto, huaji yëye beoye quëani achoguë, Riusu cocare masiye caye te'e ruiñe poreye yëyë yë'ë. Ja'anre ro'tajën, Espíritu coñete senjën, Riusuni yë'ë ba'iyete ujajën ba'ijë'ën.

²⁰ Yë'ë yua ya'o huë'ena preso zeansi'quë ba'iguëta'an, Riusure yo'o conguëbi ba'iyë yë'ë. Ja'nca ba'iguëbi si'a ën yija bain ta'yejeiye ëjacuani Riusu cocarebare quëani achoye bayë yë'ë. Ja'nca sëani, Riusu cuencuese'e'ru ba'iye, baguë cocare si'a jëja te'e ruiñe cani achoye yëyë yë'ë.

Saludos finales

²¹ Yureca, yë'ë ba'iyete, yë'ë yo'o yo'oyete, ja'anre mësacuani quëaye yëguëbi mai te'e bain-guë ai yësi'quë Tíquico hue'eguëte mësacuana saoyë. Cristo yo'ore te'e ruiñe conguë'bi ba'iji baguë. Ja'nca ba'iguëbi yë'ë ba'iye si'ayete mësacuani quëaja'guë'bi.

²² Ja'nca quëaguëna, mësacua yua baguë cocare achaní, yëquëna ba'iyete te'e ruiñe masini, jëja recoyo re'huaye poreja'cua'ë mësacua.

²³ Yureca, mai Taita Riusu, mai Ëjaguë Jesucristo, bacua recoyo re'o huano güeseyete señë yë'ë. Mësacuani ja'nca re'o huano güesejën, mësacuani ai ba'iye ai carajeiye beoye re'oye yo'ojën ba'ija'bë. Mësacua yua Riusu bain ai yësi'cuabi baguëni si'a recoyo ro'tajën, baguëni ai yëreba yëjën ba'ijë'ën.

²⁴ Mai Ëjaguë Jesucristoni jo'caye beoye ai yëreba yëjën ba'icua, si'acuabi Riusu bayete carajeiye beoye ro coní bajën ba'ijë'ën. Ja'nca raë'ë. Amén.

**Riusu cocabera: mai ëjaguë Jesucristo
ba'iyete toyani jo'case'e'ë
New Testament in Siona (CO:snn:Siona)**

copyright © 2009 Wycliffe Bible Translators, Inc.

Language: Siona

Translation by: Wycliffe Bible Translators, Inc.

Siona [snn], Colombia

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Siona

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

xxx

please contact the respective copyright owners.

2014-04-30

PDF generated using Haiola and XeLaTeX on 28 Dec 2024 from source files
dated 29 Jan 2022

ce8413d6-ff57-5b18-bda5-72d8f77005b2